

湘

軍

記

湘軍記卷九

東湖王定安撰

圍攻金陵下篇

同治元年正月，僞忠王李秀成率數十萬眾窺松滬，朝議令浙江按察使曾國荃以新軍六千換防安慶，而自率勝兵八千援上海。

寄諭垂詢者屢矣。曾國藩已薦李鴻章建旆而東，則悉以規復金陵委之國荃。自安慶之克，國荃乘機掃盪，前軍已抵無爲，滇鎮以兵少募之長沙。二月，率新軍至安慶，與國

藩商進取

詔擢國荃江蘇布政使三月國荃引兵規巢和令劉連捷屯望城岡自將六千人屯巢縣東北李成謀領水師攻銅城牐陳湜陸師會之牐東西賊壘皆下乘勝克雍家鎮壬寅圍巢縣城賊聞銅城牐已破則大恐思逃國荃揮軍躍登殺守陴數人城內驚擾皆奪門走斬千餘人遂克巢縣追之至含山張兩翼抄擊大破之含山賊望見不戰而遁同日復其城甲辰進襲和州克之躡之鍼魚觜三城之賊皆在國荃合水陸圍擊殲焉乙巳克濡須口而天門博望

兩山橫峙大江中賊恃之爲門戶所謂東西梁山者也國
荃已東至和州則令舟師循江西上攻西梁山燒其鐵鎖
已已賊棄山奔國荃分兵守之時乘小舸沿洞江上或單
騎瞭形勝以金柱關爲蕪湖藩衛羣湖所自出乃約彭玉
磨攻之率外江內湖淮揚十八營盛兵趨金柱是時曾貞
幹循南岸克繁昌南陵鮑超克青陽石埭太平涇縣四月
壬申國荃引軍南渡彭玉磨已先至金柱關國荃自將七
千人嚮金柱乘賊不備襲太平府賊不虞我軍至閉關不
及國荃軍已入北門遂克太平乃合水師攻金柱燒關內

外廬舍羣賊冒火奔逸短兵要擊積尸累隄勝癸酉克金柱關進平三汊河上駟渡賊壘凡數十獲大礮三百七十旂刀矛萬計分遣水師王明山攻烏江黃翼升擊東梁山復下之進軍蕪湖曾貞幹黃翼升陳湜鼓眾先登貞幹先遣人說賊降至是賊自相驚官軍乘亂急攻甲戌克蕪湖水師王明山復克烈山石壘彭玉磨調上游水師集濡須於是沿江諸隘皆官軍壘矣五月國荃進攻秣陵關守賊舉關降乃遣軍繞三汊河後偏金陵城西大勝關編木作橋伏精兵橋畔而以後隊捲旗疾趨賊懼爲長圍所困乘

夜縱火棄巢走癸未奪大勝關三汊河兩壘平之時彭玉
磨駐金柱關聞國荃懸軍深入懼爲賊乘乃調水師由烈
山駛入頭關甲申昧爽國荃亦至水師破浪仰擊陸軍乘
之拔頭關玉磨進攻江心洲洲有石壘雙峙屹若堅城水
師飛礮入壘賊亦穴牆還擊戰至日晡水師挾火具登岸
蛇行蘆葦中逼壘縱火我軍躍入賊壘燒薙羣醜撲水死
者無算水師乘勝鼓枻飛行奪蒲包洲遂泊金陵之護城
河口國荃由陸路倚護水師驅軍直逼金陵營於雨花台
玉磨乘輕舸至下關曾貞幹駐三汊河江東橋傍水築壘

保西路糧道是爲楚軍圍攻金陵之始。自向榮和春以兵八九萬屯守八年卒無功。曾國藩初議移李續宜多隆阿兩軍南渡。鮑超出西路。合曾國荃彭玉麟水陸共圖金陵。多隆阿已授欽差大臣。移兵援陝。李續宜前令圖淮南北。猶留湖北不至。鮑超戰甯國。未能遽東。國荃軍合水師不滿二萬。孤軍深入。諸將帥皆以爲不可。國藩亦深憂之。手書令待他軍集而後進。國荃報曰。諸軍士自應募起義。人以攻金陵爲志。今不乘勢薄城下而還軍待寇。則曠日持久。非利也。且金陵爲賊根本。拔其根本。卽枝葉不披而

葵金陵恃江南北各城爲屏蔽江南北各城亦恃金陵爲
應援克其一城移軍他往賊又隨踞之徒使我疲於奔命
而賊旋走旋踞是攻奪無已時也今以一軍直搗金陵蘇
常各賊聞江甯攻急必更來援彼時遣別將間襲蘇常吾
因而乘之殄寇犁穴在此舉矣國藩許之圍攻之勢乃定
洪秀全見官軍已薄城數使使趣李秀成自蘇常赴援而
選悍黨二萬出城攻雨花台湘軍久勝鋒銳甚比交綏無
不一當十守賊創見皆大驚乃收入金陵江北大將都興
阿聞楚軍至遣師船自瓜洲鼓柁而西攻觀音門襲燕子

礮破之降將李世忠自六合渡江克石埠橋東陽龍潭結壘守之皆爲楚軍聲援癸卯國荃敗賊六郎橋而城賊日出窺覘輒被創洪秀全益恐促浙酋李世賢蘇酋李秀成還金陵是時左宗棠攻衢州與李世賢相拒遂安龍游間李鴻章新克松江廳縣李秀成奔命未遑乃先遣其僞國宗引兵數萬自蘇州西援六月癸巳與國荃戰雨花台兩軍互損傷辛酉復撲大營戰不利還走入城乃謀分兵綴我丁卯列二十餘隊隊各趨一壘而以銳卒突雨花台長濠濠寬深不得過則以火器環擲國荃憑濠拒守伺賊已

近令劉連捷拔卡縱擊斬二千人。僞對王殲於陣。羣賊乃大奔。時溽暑大雨。國荃令軍士冒雨修垣。洪酋益調甯國賊二萬出雄黃鎮。夜襲營。丙子。國荃遣將要擊。甯國賊復敗走。城賊既屢挫於圍師。則閉門專待蘇浙援。國荃益增壘浚濠以備之。七月。江南難民就食襄下河。城鎮輒數千人。都興阿以聞。

朝旨慮逸賊偷渡。令曾國藩撥兵防守。時黃翼升署江南提督。領淮揚水師赴上海。國藩議興太湖水師。由澱湖達蘇州。移黃翼升水師防淮揚襄下河。八月。江南大疫。徽甯

尤甚。鮑超等病不能軍。金陵圍師亦苦癘疾。閏八月疫猶

未已。軍士互傳染死者山積。

曾國藩金陵湘軍陸師昭忠祠記曰我軍薄雨花台未幾

疾疫大行。兄病而弟染。朝笑而夕僵。十幕而五不常爨。一

夫暴斃數人。送葬比其反而半。殆於途近縣之藥既罄。乃

巨艦連檣。徵藥於皖鄂諸省。會有天幸。九帥獨不病。國藩憂懼。奏言戰事方利。而天

災流行。若賊乘危來攻。不特不能戰守。且不能預逃以待

再振。數年來百戰所得之地。由尺寸廣至數百里。前功將

隳。臣德薄不能挽厄運。請

簡親信大臣馳赴江南。分責任之重大。挽氣數之艱難。

穆宗詔曰。近日秋氣已深。疫病未息。甯國金陵徽衢上海

蕪湖各軍皆以瘟疫死亡相繼。鮑超、張運、蘭楊、岳斌等均各抱病軍中。甚至炊爨寥寥。此時戰守均無把握。朝廷信用楚軍。以曾國藩忠勇發於至誠。推心置腹。冀以挽救東南全局。自諸軍近逼金陵。逆匪老巢已成阱檻。惟以艱難時會。誠不易得。疊諭毋徒求效旦夕。但當立足不敗之地。以竢可乘之機。今將士疫病之餘。豈忍重加督責。其各傳旨優加存問。此無可如何之事。非該大臣一人之咎。意者朝廷政事多闕。足以上干天和。我君臣當痛自刻責。勉圖禳救之方。爲民請命。以冀天心轉移。至天災流行。賊中豈

無傳染刻下在京固無可簡派之人環顧中外才力氣量如曾國藩者一時實難其選該大臣素嘗學問尤當任以毅力矢以小心不容一息少懈也當是時羣醫旁午病者方資休息而偽忠王李秀成引兵三十萬自蘇常奔至號六十萬東起方山西訖板橋鎮連營數百國荃兵不滿三萬賊圍之數匝彭玉麟楊岳斌水師皆阻隔不相聞諸將懲向榮和春之失謀潰圍就水師退保蕪湖國藩在安慶憂之廢寢食飛檄令撤圍國荃令於眾曰賊以全力突圍是其故技向公和公正以退而致挫今若蹈其覆轍賊且

長驅西上大局傾覆何蕪湖之能保夫賊雖眾皆烏合無紀律且久據吳會習於驕佚未嘗經大挫吾正苦其散漫難徧擊今致之來聚而創之必狂走吾乃得專力搗其巢破之必矣願諸君共努力諸將諾服己亥乃分圍師爲三以其二防城賊侵襲國荃自將其一當援寇一夕築小壘無數障糧道以屬之江賊益番休迭進蠟傳環攻累箱實土以作櫓楫挾西洋開花礮自空下擊所觸皆摧國荃留孱卒守棚選健者日夜拒戰更代眠食常以火毯大礮燒賊無算賊仍抵死弗退軍士傷亡頗眾己酉部將倪桂節

中礮殞國荃左頰受鎗傷血漬重襟猶裹創巡營歷半月賊稍卻而偽堵王黃文金出東壩攻金寶圩爲李秀成聲援鮑超遣軍禦之新河莊爲所乘水師亦困於金柱關賊燄益張乃掘地道陷官軍壘國荃屢堵合之亦時以穢鹵倒浸穴中九月壬子僞侍王李世賢復自浙江糾眾麇至合秀成軍號八十萬國荃度浙寇新來氣盛誠諸將厚集其陣暇以待之賊負板擔草土填濠我軍拒濠發礮賊屢卻仍堅壁不出相持兩晝夜甲寅乃發萬人開壁擊之軍士氣十倍呼聲動天當者無不摧靡一日內破堅壘十三

殺八千人。援賊氣奪。乃益鑿地埋火藥。辛酉。兩穴同發。土石飛躍如雨。大營牆圯。賊隊猛進。國荃督軍士露立牆外。環擲火毬。閒以鎗礮。賊前者旣殪。後者復登。踰三時。牆缺復合。殺悍寇數千。羣賊乃謀晝息宵攻。輪進以疲我。連營周百里。其近者距官軍才二十丈。仍潛開隧道。乘雨夜轟之。國荃令各軍掘內濠。翼以外牆。破其地洞七。賊計始窘。十月。國荃度賊力疲。可一戰破也。乃誡諸將秣厲以俟。壬午。引軍出濠。克十餘卡。知賊不任戰。軍益大出。癸未。李臣典等出東路。曾貞幹出西路。彭毓橘。蕭孚泗等出南路。甲

申天嚮曙。臣典燒東路四壘。火光燭天。西南諸賊望見。洵
懼。棄壘逃。貞幹偵三汊河賊宵遁。急引兵趨之。遇逃寇。則
縱兵要擊。追之板橋周村。彭毓橘追至牛首山。王可陞搜
賊方山西。諸賊在東路者。繞南門逸。其在西南者。走秣陵。
關於是蘇浙賊數十萬皆遁。金陵圍師解嚴。是役也。李秀
成率十三僞王赴援。李世賢繼之。楊輔清黃文金圍鮑超
於甯國。陳坤書出太平窺金柱關。以困水師。悍酋萃一隅。
我軍幾殆。憊不振。曾國藩固以進攻金陵爲非計。業被圍
則飛檄調蔣益澧程學啟馳救。益澧在浙。學啟在蘇。皆有

故不得至。國荃孤軍居圍中，戰守四十六日，殺賊五萬，我軍亦傷亡五千。將士皮肉幾盡，軍興來未有如此之苦戰也。

穆宗念楚軍勞敝，

優詔獎國荃，而慮賊再舉，國荃兵不足，令國藩調鮑超、出東壩、會勦。國藩乃增募五千人，畀國荃軍。於時李秀成由九洑洲北渡，陷和州、含山、巢縣。其南走者，西掠績溪，陷祁門。唐義訓等隨克之。賊勢益渙，水師之困於蕪湖也。國荃已分兵守東梁山，復遣朱南桂、朱洪章、羅逢元、扼金柱關。

夾河而與之上下。亂流而相攻。水師捷。陸營或挫。一夕數驚。比賊陷巢和。皆湘軍新得之城。國荃急分兵守西梁山。而令劉連捷彭毓橘等引兵北援。十一月。楊岳斌連破賊於三汊河。合金柱守將羅逢元攻之。護駕墩燒賊舟二百餘。劉連捷循江西上。合毛有銘軍進屯石澗埠。而鮑超亦敗賊甯國。湘軍聲勢復盛。是時曾國荃已擊走蘇浙諸寇。攻守益暇。曾國藩終以孤軍蹈危地爲失策。乃議案視沿江諸壘。赴金陵親決進止焉。

二年正月。曾國藩自安慶出巡。南浮池州達蕪湖。北權至

濡須遂登東西梁山。泛舟金柱關。復北至烏江。與楊岳斌偕之金陵。登大勝關。入雨花台營。見國荃圍軍堅穩。大喜。始罷退師之議。留十日去。二月還安慶。奏陳可喜可懼數端。以爲徽池甯國等屬黃茅白骨。或竟月不逢一人。蘇浙之田多米耕種。羣賊圖竄江西。并窺伺皖浙已復之區。平民無所得食。弱者轉徙溝壑。黠者從賊以偷生旦夕。黨羽無定數。酋長無定謀。誠恐變爲流賊。更難收拾。此其可懼者也。粵匪初起。頗能禁止姦淫。聽民耕種。故取江南數郡之糧。出金柱關。江北數郡之糧。出裕溪口。並輸金陵。和春

等合圍城外。賊仍擅長江之利。挹不竭之源。今耕者廢業。煙火斷絕。賊行無民之境。猶魚行無水之地。豈有能久之理。而安慶蕪湖廬州甯國東西梁山金柱關裕溪口暨浙之金華紹興皆爲我有。此皆山川筋絡必爭之地。但能守而不失。終足制賊死命。昔年賊之所至。築壘如城。掘濠如川。近亦日就草率。而官軍修壘濬濠。遠勝於昔。賊中羣酋受封至九十餘王之多。各爭雄長。敗不相救。而官軍和衷共濟。三江兩湖呼應靈通。此其可喜者也。如金陵蘇杭三處。有一二克復。卽當大赦羣酋。廣爲招撫。以庶幾赤眉百

萬同日納降之盛軌。

詔嘉許之。三月，授曾國荃浙江巡撫，仍留攻金陵，以閩浙總督左宗棠兼權之。國藩與國荃交疏懇辭。

穆宗優旨慰勉。四月，李秀成西掠至六安，將犯湖北，聞蘇州警，乃大掠而東。李鴻章約國荃自上截之。國荃策賊不南，拔蘇州，則北走裏下河，乃益攻金陵，以綴之。時劉連捷、鮑超等已克巢、含、和州，湘軍勇氣自倍。癸卯夜，國荃分軍六路，李臣典等攻雨花台、石城，趙清河等攻聚寶門、南卡，晏澧、周等攻西卡，何玉貴等攻東卡，陳湜出中路，蕭孚泗

易良虎等左右應之。夜已半，軍士蛇行薄石城，束草填濠。將登，賊驚覺，然礮外擊，踣五人。眾頗逡巡。李臣典斬二卒以徇，搥旗直上，毬箭星落入城。天嚮明，敵樓火發，賊奔救。我軍已乘煙霾而入，遂克雨花台僞城。諸將乘勝猛攻，於是金陵城西南九壘皆下。國荃分二千人守石城，築六新壘輔之。李秀成在江北聞之，益洶懼。又以崑山新克，慮滬軍圍蘇州，乃改圖南渡。天長六合來安皆解圍。五月，楊岳斌、彭玉、廖水師次江浦。蕭慶衍、陸師出烏江，與鮑超、劉連捷會師。浦口、江浦、橋林賊皆不戰而遁。走九洑洲，洲賊拒。

不納投江及餓死者無算。曾國荃乘夜至新江，與玉麐、岳
斌覘形勢。九洑洲賊築堅城，列巨礮以戰艦護之。每官軍
至洲，賊必全力走江北，或南掠甯國以誘我。翼長溫紹原
總統張國樑雖克之而不能守也。及國荃欲合圍，都興阿、
馮子材爭言九洑危險。

朝議憂疑。含山之再陷也，李世忠以三萬眾扼九洑，不勝。
賊愈增壘，緣洲列礮艇，自以爲堅不可拔矣。國荃度陸師
難飛渡，宜先清南岸諸隘，乃可會師北伐。丁巳，遣丁泗濱
等南從秦淮嚮下關。喻俊明等北繞永安洲，向草鞋夾。彭

楚漢等爲後應。王麐率水師據九洑上游，牽賊勢。岳斌自督戰，以枯荻灌油，燒賊艦數百，緣牆而登。下關草鞋夾入壘，皆克。乃移兵嚮中關。水流箭疾，羅俊友中礮死。己未，國荃分兵襲燕子磯，破之。岳斌偵江濱有閒道，達九洑賊濠，乃約國荃令陸師伏叢莽中，從隄埂缺處水而進。彭楚漢、張錦芳師船夾洲上下，丁泗濱攻南岸中關。庚申，昧爽，兩岸戰旗並舉，人人殊死戰。中關賊閉不出。九洑賊伏洋鎗隊於洲，三面伺閒出擊。官軍精銳多傷亡。至夜，王麐令曰：「洲破乃還師，不者傳餐而戰。」時月色冥濛，西南風大作，我

軍闇移船近賊壘以火箭射賊舟風烈火猛延及洲上卡棚喻俊明等麾軍直上成發翔彭楚漢從左右呼譟而登丁泗濱自南岸鼓棹飛渡將士踐尸以進九洲竟破萬餘賊無一脫死者癸亥國荃攻長干橋賊壘復大破之長江肅清捷未上都興阿先以聞

穆宗喜其速慮賊逸揚州

詔國藩預防裏下河而賊已聚磯洲中國荃乃檄蕭慶衍自江浦南渡屯神策門鮑超繞鍾山屯孝陵衛論者多言城大兵單合圍不宜驟恐援賊乘隙撼全局國荃曰今浙

軍攻富陽。滬軍攻蘇州。羣賊奔命。此亦天亡時也。吾乘其急而合圍。彼備多力分。縱不卽克金陵。其收效蘇杭必矣。國藩以爲然。乃令國荃增募萬人。於是金陵圍師近四萬矣。六月。鮑超進軍鍾山。將屯孝陵。因軍士病。駐神策門。洪秀全遣黨出儀鳳門攻鮑超。又出太平門攻劉連捷。我軍擊卻之。七月乙巳朔。犯下關。李成謀力戰卻之。壬子。國荃攻印子山。克之。進攻上方橋。橋在城東南隅。賊運糧道也。甲子。國荃令蕭慶衍出印子山東。偪賊而軍。城賊來爭。蕭孚泗李臣典張詩日分禦之。賊堅壁不出。癸巳。熊登武越

上方橋五里築小壘六絕賊糧賊患之糾大眾出戰蕭孚泗伍維壽馬步包抄追之秣陵關破十餘卡悉奪泊河戰艦孚泗度賊已窮令軍士負秣稽乘夜填濠遂克上方橋而江東橋石壘高峙環以木城陳湜圍攻數月不克八月丙戌夜風霾蔽月湜選銳卒數百襲營燒其木城立拔石壘分抄至旱西門眾壘皆下時城東尙有數隘近城者曰中和橋曰雙橋門曰七甕橋稍遠者曰方山土山曰上方門高橋門迤南則爲秣陵關以至於博望鎮亦金陵外輔也九月國荃令蕭慶衍等結筏渡水扼東路立營賊已先

據河東拒我蕭慶衍隔河發礮朱吉玉李祥和踞西岸築三壘與賊相持甲子李祥和從上游蕭孚泗從下游渡河破其五壘城賊來援蕭慶衍且戰且築東岸壘已成戊辰賊復諸道並出蕭孚泗彭毓橘陳湜等扼雙橋門以東蕭慶衍進中路戰少卻將士奮臂大呼賊皆反走蕭慶衍縱騎兵斷其歸路遂克上方門高橋門而右路方山土山之賊爲熊登武所敗亦棄壘奔於是七甕橋羣賊思遁蕭孚泗彭毓橘扼其東李臣典遮其西城中忽出大隊兩軍相搏互傷死孚泗乘夜縱火賊冒煙突出遂克七甕橋乃由

方山南進秣陵關。攻博望鎮。賊環鎮築七壘。上可應水陽。旁可控金柱關。金柱守將朱南桂聞鮑超有事於水陽。約朱洪章等出小丹陽以襲博望。俾不得爲水陽援。南桂乘夜銜枚疾進。昧爽抵博望。克其二卡。賊開壁大戰。武明良繞出頭壘襲其營。賊反顧七壘已易官軍幟。乃錯愕狂走。南桂追之長流鰲溺死強半。國荃以博望旣克。則中和橋之勢孤。己巳令趙三元率馬步七營南略秣陵。至中和橋一戰克之。秣陵賊見馬步驟至棄釜逃。諸將追至河干阻水不能渡。僅殺尾賊二百餘。自是紫金山西南無賊壘矣。

辛未國荃親至孝陵衛勘地勢將移營合圍賊出朝陽太平門來襲蕭慶衍陳湜分截之蕭孚泗李臣典傍賊鈔入戰方酣有賊目指揮督陳國荃伏鎗擊之殪賊陣乃亂僞章王順王退入城餘賊走涇化鎮時甯太賊進屯高涇溧水謀襲蕪湖彭玉麟率水師躬攻水陽楊岳斌來會遂克審灣金寶圩水陽新河莊塘溝諸壘十月乙亥克滄溪長樂賊酋楊友清降高涇復丙子易開俊復甯國縣戊寅國荃克涇化解溪隆都湖墅三壘燬賊壘二十餘於是金陵東南剗削略盡庚辰彭玉麟楊岳斌鮑超克東壩復建

平深水解散萬計。戊子國荃遣軍屯孝陵衛。是月李鴻章克蘇州。李秀成先期遁。無錫十一月。曾國荃掘地道成。戊申火發。神策門城圯。我軍肉薄爭登。阻月城橫洞不能克。傷死三百餘。李秀成自蘇州領敗眾數萬。分布丹陽句容間。自率數百騎入太平門。勸洪酋棄城同走。不聽。乃貽書溧陽。約李世賢就食江西。曾國荃益募新軍。增圍師。遂至五萬人。援賊還金陵者皆不敢出。左宗棠議以爲當分軍攻廣德。國藩以賊勢猶盛。懼軼蹂江西。持不許。乃令諸將堅守涇縣旌德太平石埭青陽池州六城。咨左宗棠嚴浙。

防沈葆楨預堵江西以備焉

三年正月戊申李世賢黃文金陷績溪曾國藩遣毛有銘
自安慶率六千人趨休甯未至賊已越徽州犯江西李秀
成日說洪酋出就食洪酋仍妄稱天命不肯去秀成不得
已留金陵城守曾國荃度賊糧將匱約楊岳斌水師巡江
見奸民運米入城輒奪之又令朱洪章等繞鍾山後斷陸
路運道調降將韋志俊守金柱關移朱南桂助圍金陵南
桂冒雪營城北偵賊酋李士貴赴句容護糧伏兵要之賊
棄糧走國荃益銳意合圍癸亥周歷洪山北岡山神策門

太平門李秀成自將出鍾山南攻朱洪章營洪章與武明
良出濠夾擊沈鴻賓等出右路武文山等出左路戰良久
殺數百人賊退上山羅雨春攀巖而上中鎗幾墜沈鴻賓
繼至各挾火毬火箭擲壘中賊笑火逃遂克鍾山石壘賊
所署爲天保城者也國荃遣黃潤昌等戍之令蕭孚泗蕭
慶衍出山北列隊太平門築三壘以王遠和等守之維時
梁美材屯洪山朱南桂屯北固山寨神策門餘元武湖阻
水爲圍於是金陵城圍始合賊糧絕矣二月左宗棠克杭
州李秀成益懼日放婦孺出城節食秀成屢以無米告洪

酋洪酋誑眾曰闔城食甜露可以養生甜露者草也眾雖知其誕而無如何乃於城內種麥濟飢三月壬寅鮑超克句容丙辰克金壇其時蘇浙賊道徽州走江西曾國藩乃令鮑超還軍援江西

朝旨促國藩赴金陵督師國藩以徽州警上游危急仍留安慶策應乙丑國荃攻金陵月圍破之月圍者賊附城築垣以拒我地道者也金陵城周百里國荃日令軍士鑿隧道凡南門一穴朝陽至鍾阜門三十三穴篝火而入地或崖崩窟塞則縱橫聚葬於其中賊乃築月圍穿穴拒我時

以毒煙沸湯入穴中軍士多死至是國荃破月圍焚其火藥殲賊無數官軍傷亡亦三千人四月庚午李鴻章克常州壬申馮子材復丹陽敗賊由廣德趨徽州者日夜相繼楊岳斌鮑超皆西援乃以蘇軍劉銘傳屯句容鄭國魁屯東壩周盛波屯溧陽之南渡定埠五月

朝廷以金陵垂克而河南捻犯麻城皖賊深入江西恐掣全局

詔李鴻章會攻金陵金陵諸將以城破可計日待恥借力於人鴻章亦言盛暑不利火器延不至

穆宗欲速其功益促鴻章激之國荃亦以此激諸將期必破而龍膊子石壘賊所號地保城者不得則形勢終不便乃日夜發礮攻之己巳李祥和等奪石壘遂築礮台其上俯瞰城中礮擊處城堞皆圯國荃慮師老且生變益督李臣典等當礮密處潛穴其下而積溼蒿覆沙土高與城等聲言將踐登以疑賊六月天久不雨國荃露禱須臾龍見雨大至甲申地道成國荃夜寢若有人促之驚起趨洞口呼守軍李秀成果出襲營遣黨持火蛋燒蘆蒿伍維壽彭毓橘分擊獲免己酉國荃令朱式雲草檄誡諸軍懸賞募

敢死士待城破先入。於是李臣典、朱洪章、伍維壽、武明良、譚國泰、劉連捷、沈鴻賓、張詩日、羅雨春九人誓先登。日午，地道火發，城崩二十餘丈，輒石雨落。李臣典等蟻附爭登，賊反然火藥下燒我軍，眾稍卻。彭毓橘、蕭孚泗手刃數人，弁勇皆奮，乘城缺入。朱洪章、沈鴻賓、羅雨春等攻中路，在僞天王府北。劉連捷、張詩日、譚國泰等攻右路，循臺城趨神策門。適朱南桂等梯攻而入，遂合取儀鳳門。左路則彭毓橘由內城至通濟門，蕭孚泗等奪朝陽洪武門，守陴賊誅殺殆盡，而羅逢元等從聚寶門入。李金洲從通濟門入。

陳湜易良虎由旱西水西門入李秀成方趨旱西門爲陳湜軍所阻乃還走清涼山匿民房黃翼升水師攻奪中關乘勝至旱西門與陳湜等合於是金陵九門皆破日已暝矣賊猶保子城夜半賊縱火燒僞王府因突圍走黃潤昌等露立龍廣山袁大升等循城南遇逃賊要擊斬數百人張定魁等追賊及之湖熟俘斬數百人城賊多自焚或投池井洪秀全已前一月死其子洪福瑱年十五六餘黨挾之走廣德秀全子本名天貴福其刻印稱洪福下列眞王二文誤合爲瑱其稱洪福瑱以此國荃傳令閉城救火獲

僞玉璽二金印一。蕭孚泗搜獲僞王兄洪仁達、僞忠王李秀成、斃賊十餘萬。凡僞王主將、天將及大小酋目三千皆死。亂兵拔難民數十萬，捷聞，朝野相慶。海外轉相驚告，先是西洋人屢請助攻，又請調印度兵。國荃皆不許，而外夷桀者頗暗助寇。國荃漫擊之，與賊同殲於陣。金陵既克，西洋諸酋皆來賀。曾國藩官文合詞奏言：「臣等伏查洪逆倡亂十有五年，竊據金陵亦十二年，流毒海內，神人共憤。我朝武功之盛，超越前古，屢次削平大難，焜耀史編。然如嘉慶、川楚之役，蹂躪僅及四省，淪陷不過十餘城。康熙三藩

之役蹂躪尙止十二省淪陷亦三百餘城今粵匪之變蹂躪竟及十六省淪陷至六百餘城之多而其中凶酋悍黨如李開方守馮官屯林啟容守九江葉芸來守安慶皆堅忍不屈此次金陵城破十餘萬賊無一降者至聚眾自焚而不悔實爲古今罕見之劇寇然卒能次第蕩平剷除元惡臣等深惟其故蓋由我

文宗顯皇帝盛德宏模早裕戡亂之本

宮禁雖極儉嗇而不惜巨餉以募戰士名器雖極慎重而不惜破格以獎有功

廟算雖極精密而不惜屈已以從將帥之謀

皇太后

皇上守此三者悉循舊章而加之去邪彌果求賢彌廣用能誅除僞僭蔚成

中興之業臣等忝竊兵符遭逢際會旣痛念我

文宗不及目睹獻馘告成之日又念生民塗炭爲時過久惟當始終愼勉掃盪餘匪以蘇子黎之困而分

宵旰之憂

穆宗詔曰官文曾國藩紅旗奏捷克復江甯省城覽奏之

餘實與天下臣民同深嘉悅。洪秀全自道光三十年倡亂，由廣西竄兩湖三江，並擾及直隸山東，百姓遭其荼毒，慘不忍言。罪惡貫盈，神人共憤。我

皇考文宗顯皇帝赫然震怒，恭行天罰。

命兩湖總督官文爲欽差大臣，與湖北巡撫胡林翼肅清楚北上游。胡林翼駐紮宿松，籌辦東征，復

授曾國藩兩江總督，欽差大臣。號令旣專，功績日著。十一年七月，我

皇考龍馭上賓。其時江浙郡縣半就淪陷。

遺詔諄切以未能迅殄逆氛爲憾朕以冲幼寅紹丕基祇承先烈恭奉

兩宮

皇太后垂簾聽政

指示機宜

授曾國藩協辦大學士節制四省軍務以一事權該大臣自受任以來卽建議由上游分路剿辦飭彭玉璠楊岳斌曾國荃等水陸並進疊克沿江城隘百餘斬馘外援逆匪十數萬人合圍江甯斷其接濟六月十六日曾國荃克復

江甯據各賊供稱首逆洪秀全實於本年五月服毒而死。偽幼主洪福瑱重襲偽號。城破後。假裝官軍號衣。向太平門缺口衝出。曾國荃加派馬隊追至淳化鎮。生擒偽烈王李萬材。據供偽忠王之兄巨王幼西王幼南王定王崇王璋王。乘夜衝出。被官軍馬隊追及。將各頭目全行殺斃。其餘兩廣兩湖多年悍賊。經各將士於十七八日搜殺淨盡。此皆仰賴

昊蒼眷佑。

列聖垂庥。

兩宮

皇太后孜孜求治。識拔人材。用能內外一心。將士用命。成此大功。上慰

皇考在天之靈。下孚薄海臣民之望。自惟藐躬涼德。何以堪此追思。

先皇未竟之志。不克親見成功。悲愴之懷。何能自己。該領兵大臣等。櫛風沐雨。艱苦備嘗。允宜特沛殊恩。用酬勞勩。欽差大臣協辦大學士兩江總督曾國藩。自咸豐三年在湖南首倡團練。創立舟師。與塔齊布羅澤南等屢建殊功。

保全湖南郡縣克復武漢等城肅清江西全境東征以來由宿松克潛山太湖進駐祁門屢復徽州郡縣遂拔安慶省城以爲根本檄水陸將士規復下游州郡茲幸大功告成逆首誅鋤實由該大臣籌策無遺謀勇兼備知人善任調度得宜曾國藩著賞加太子太保銜錫封一等侯爵世襲罔替賞戴雙眼花翎浙江巡撫曾國荃以諸生從戎隨同曾國藩剿賊數省功績頗著咸豐十年由湘募勇克復安慶省城同治元二年連克巢縣含山和州率水陸各軍進逼金陵駐紮雨花台攻拔僞城賊眾圍營苦守數月奮

力擊退。本年正月克鍾山石壘。遂合江甯之圍。督率將士
鏖戰。開挖地道。躬冒矢石。半月之久。未經撤隊。實屬堅忍
耐勞。公忠體國。曾國荃著賞加太子少保銜。錫封一等伯
爵。賞戴雙眼花翎。記名提督李臣典。於鎗礮叢中。搶挖地
道。誓死滅賊。從倒口首先衝入。眾軍隨之。因而得手。實屬
謀勇過人。著加恩錫封一等子爵。賞黃馬褂。雙眼花翎。蕭
孚泗督辦礮台。首先奪門而入。並搜獲李秀成洪仁達。實
屬勤勞卓著。加恩錫封一等男爵。賞雙眼花翎。其餘文武
一百二十餘員。論功進秩有差。

穆宗又以各路統帥疆臣共濟時艱特加異數以昭恩渥於是欽差大臣科爾沁親王僧格林沁加賞一貝勒欽差大臣大學士湖廣總督官文江蘇巡撫李鴻章俱錫封一等伯爵賞雙眼花翎陝甘總督楊岳斌兵部右侍郎彭玉磨均賞給一等輕車都尉太子少保銜四川總督駱秉章賞給一等輕車都尉雙眼花翎浙江提督鮑超賞給一等輕車都尉西安將軍都興阿江甯將軍富明阿廣西提督馮子材均賞給騎都尉京口副都統魁玉賞給雲騎尉漕運總督吳棠賞給頭品頂戴惟閩浙總督左宗棠杭州將

軍國瑞。江西巡撫沈葆楨。但奉

璽書褒獎。俟浙江江西肅清。再行加恩。曾國藩自安慶至金陵。掘洪秀全尸於偽宮。戮而焚之。七月。國藩親訊李秀成。洪仁達。洪仁發等。讞成。駢誅之。李萬材供洪福瑱已死。而江西浙江諸軍。方欲張賊勢。爭言洪福瑱未死。左宗棠沈葆楨交疏譏刺。曾國藩奏言。臣抵金陵。接見諸將。均有憔悴可憐之色。臣宣道

皇仁。多方撫慰。旣獎其可憫可敬之功。復勛以忘死忘勞之義。至僞天王逆尸。將士積憤之餘。皆欲得而甘心。直至

六月杪始從偽宮內掘出扛至營次該逆尸遵尙邪教不用棺木徧身包裹繡龍黃緞雖膀腳亦係龍緞頭禿無髮鬚尙全存已開白矣左股有膀肉猶未脫驗畢戮尸舉烈火而焚之有偽宮婢者係道州黃姓女子卽手埋逆尸者也臣親加訊問據供洪秀全經年不見臣僚四月二十七日因官軍攻急服毒身死祕不發喪十餘日始行宣布等語僞幼主洪福瑱繞室積薪爲城破自焚之計眾供皆合連日在偽宮灰燼之中反復搜尋茫無實據觀其金玉二印皆在巷戰時所奪取又似業已逃出偽宮者李秀成則

稱曾經挾之出城始行分散然此次逃奔之賊僅十六夜
從地道缺口逸出數百人曾經騎兵追至湖熟圍殺淨盡
自十七日後曾國荃卽將缺口封砌關閉各城搜殺三日
洪福瑱以十六歲童騃縱未斃於烈火亦必死於亂軍當
無疑義李秀成之被擒也各營之降卒附城之居民人人
皆識觀者如堵鞠訊屢日親供多至數萬字敘髮逆之始
末述忠酋之戰事甚爲詳悉又力勸官軍不宜專殺兩廣
之人恐粵匪愈孤逆黨愈固軍事仍無了日其言頗有可
采日來在事文武皆請將李秀成檻送京師卽洋人戈登

威妥瑪來賀者亦以忠酋解京爲快臣竊以爲

聖朝天威滅此小醜除僭號之洪秀全外其餘皆可不
必獻俘自來元惡解京必須誘以甘言許以不死李秀成自
知萬無可逭在途或不食而死或竄奪而逃翻恐逃顯戮
而貽巨患又李逆權術要結頗得民心城破後鄉民憐而
匿之蕭孚泗生擒李逆之後鄉民竟將親兵王三清殺而
投諸水中若代李逆報私忿者李秀成旣入囚籠次日又
擒僞松王陳德風一見李逆卽長跪請安臣聞此二端惡
其民心之未去黨羽之尙堅卽決計就地正法以絕後患

遂於初六日行刑。其洪仁達一犯，係洪秀全之胞兄，與其長兄洪仁發，皆暴戾恣橫，多行不義，爲李秀成所深憾，且如醉如癡，口稱天父不絕，因其抱病甚重，已於初四日先行處死矣。秀成既誅，謗者頗以未獻俘爲疑，而首功李臣典病卒，蕭孚泗以喪歸國，荃傷病未愈，因請疾還鄉里，散遣所部二萬五千人，留萬人防金陵，萬五千人備皖北游擊。國藩素謙退，以大功不易居，力言湘軍暮氣不可復用，主用淮軍。其後倚淮軍以平捻，然國藩之言，以避權勢，保令名。其後左宗棠、劉錦棠平定關內外回寇，威稜西域。

席寶田征苗定黔中王德榜與法郎西戰越南皆用湘軍
暮氣之說庸足爲定論乎吾故曰國藩之言暮氣謙也若
欲淬厲朝氣則在後來之將帥不系乎湘軍淮軍焉

王定安曰曾公國藩言軍之勝敗時也時未可爲聖哲弗
能強時可爲則事半而功倍其言允矣愚猶以爲未也夫
兵事瞬息千變其安危在呼吸之間而議者時從數千里
外懸揣而遙制之朝上一策暮更一令則將帥無所措手
足向公張公戰略優矣而起武夫乏遠識左之則左右之
則右惟知眾議可畏不暇審量敵情故朝皖暮越疲於奔

命而自忘其頓兵堅城再蹶再興而卒不能振也曾公兄弟以憂懼治軍鰓鰓焉審全局規遠勢不急旦夕之效不爲羣議所搖其有所見撼之而弗動促之而弗行詩云發言盈廷誰敢執其咎如曾公兄弟者可謂善任咎者歟由斯言之得失之機雖曰天命豈非人事哉

湘軍記卷九

東湖黃學濂校字

湘軍記卷十

東湖王定安撰

謀蘇篇

中興以來海內稱勁旅者首推湘軍其次淮軍淮軍之興發軔松滬浸淫至於畿輔然其初起由湘軍故營制餉糈皆同將裨間用楚皖人獨用西洋火器與湘軍異湘軍亦往往仿倣之曾國藩既定江南尤主用淮軍其平粵寇平捻匪常爲湘軍助

朝廷選擢將帥多於湖南安徽求之至於防海禦夷改用

泰西陣法。鳴角出令。皆夷語。則湘軍所無。要之樸誠敢戰。以效命疆場爲榮。退縮畏死爲羞。募則來。遣則去。則湘淮軍無二致也。咸豐十年閏三月。和春師潰金陵。張國樑戰死丹陽。和春旋以傷病歿。兩江總督何桂清防常州。聞警走蘇州。巡撫徐有壬閉城不納。乃奔常熟。四月戊辰。常州陷。蘇州守兵三千餘皆脆弱。不任戰。有壬以張玉良新援杭州有功。移檄請救。玉良引兵守高橋。賊間道出九龍山。拊高橋背。玉良師大挫。率敗卒走杭州。賊趨蘇州。眾號數十萬。城中驚亂。丁丑。蘇州陷。巡撫徐有壬署按察使。糧道

朱鈞死之布政使薛煥駐上海署布政使蔡映斗暨守令皆逃

詔逮治何桂清等以曾國藩爲兩江總督薛煥爲江蘇巡撫兼權總督時僞忠王李秀成主蘇州蘇常旣陷松江太倉各城皆淪於賊所存浦東三縣二廳將軍巴棟阿提督馮子材守鎮江巡撫以下皆駐上海上海者通商五口之一西人建樓設市環貨山積蘇浙紳民避難者恃西洋火器多徙居之蘇松太道吳煦負能吏名權布政使糧餉軍械皆倚以辦月獲江海關稅銀三十萬兩關道素習英法

諸酋乃以重金募印度兵用美利堅人華爾領之已而印度兵罷募華人練洋鎗號曰常勝軍常勝軍初止千人後增至四千五百其教練皆西人勇丁食糧視官軍且倍轉戰吳越間所向輒捷中夏之用西人練軍自吳煦始是時巡撫部兵尙數萬然冗散不可任侍郎龐鍾潞倡民團守常熟其他江陰太倉鄉民亦間出逐賊松江嘉定旣失而復克然皆以無援而陷楚軍圍安慶曾國藩進駐祁門論者以安慶垂克宜舉建瓴師攻東壩賊必回顧金陵卽以援蘇之兵夾擊則蘇州可復龐鍾潞亦奏催國藩南下

朝廷慮薛煥兵力單。令國藩促左宗棠等軍由皖南進規蘇常。國藩奏言。臣部李元度張運蘭回湘募勇。鮑超因傷還蜀。左宗棠新軍未到。目下皖南危乎其危。浙江亦防不勝防。臣軍到齊。須一攻廣德。一攻甯郡。勢不能繞越皖境而逕趨蘇常。前准薛煥咨函。松江上海等處水陸人數無多。欲由張玉良分撥三千人。近因江西多事。文報阻滯。張玉良嘉興一軍。與臣信息罕通。臣新膺督師江南之命。本有統轄該軍之責。惟現值皖南阽危。不能舍近圖遠。荊州將軍都興阿奉

命督辦揚州軍務官文胡林翼百計經營謀所以資送之法而三千勁旅五月口糧難以撥付以臣愚見淮徐風氣剛勁不患無可招之勇但患無訓練之人已函商官文都興阿等酌帶楚師千人馳往江北用楚軍之營制練淮徐之勇丁嚴其禁約寬其期限若得一二名將出乎其間則兩淮之勁旅不減三楚之聲威其後李鴻章創立淮軍果如國藩所策七月賊大舉圍上海薛煥吳煦會洋兵擊卻之八月甯國徽州陷楚師方戰皖南李秀成出羊棧嶺攻祁門與鮑超張運蘭左宗棠相持數月十月上海軍敗賊

金山寶山境十一月蘇州賊犯寶山守將姜德等拒卻之十二月李秀成入江西蘇州賊事僞護王陳坤書僞納王郅雲官主之

十一年二月青浦賊掠廣福林參將李恆嵩會曾秉忠水師卻之自常熟昭文以團練禦賊諸邑紳民皆修備自衛賊亦稍稍畏之青浦練紳何長治沈維城等與賊搏戰屢捷追之至嘉定沈維城戰死於是黃渡安亭香花橋所設賊局悉爲民毀俘其僞官誅之四月上海軍曾秉忠敗賊嘉興之西塘青浦賊襲北簞山營李恆嵩設伏卻之五月

嘉興賊窺金山副將黃金友戰歿於廣陳賊掠明珠菴曾秉忠水師卻之蘇州賊援青浦李恒嵩移簞山鳳凰山營退屯塘橋嘉定賊陷大場華漕諸營進逼上海參將梁勝章然巨礮拒走之八月曾國荃克安慶九月楚師循江北城鎮下之耀兵無爲羣賊股栗湖北鹽道顧文彬自武昌還上海因倡乞師之議巡撫薛煥團練大臣龐鍾璐從其策吳煦任餉事備銀二十萬兩僱外國輪船入長江濟師遣主事錢鼎銘知縣厲學湖訓導張瑛如安慶謁曾國藩涕泣乞援大學士翁心存奏蘇常紳民結團自保盼曾國

藩如慈父母請飭揀知兵大員赴通泰道江陰常熟以規蘇州。

詔國藩速遣大將慰民望國藩乃薦福建延建邵道缺道李鴻章堪疆寄令與總兵黃翼升統水陸軍東征十一月李秀成合李世賢陷杭州於是奉賢南匯川沙復失上海知縣劉郇膏往援敗歸滬上震恐論者以夷兵火器精倡設會防局官紳議僉同刑部郎中潘曾瑋航海入都謁議政王白其事奏允行之。

同治元年正月偽守王方海宗攻鎮江馮子材戰不利總

兵富陞中礮殞都興阿自揚州撥援不勝

朝旨催李鴻章援鎮江又以薛煥告急李秀成悉眾東趨垂涎松滬促曾國荃率勝兵八千援上海曾國藩奏言今蘇浙賊數太多佔地太廣須俟都興阿一軍肅清江北後路無牽制之虞然後會合上下游分路規取南岸方不至凌亂無序曾國荃新募到須進攻巢縣和州通下游鎮揚各軍之氣仍固上游無巢一面之防未便遠赴上海顧此失彼至上海餉源所出關係亦重惟有聯絡洋人協力守禦江浙賊勢浩大盡占富庶之區廣收官軍之降卒財

力五倍。人數十倍。若非慎以圖之。不特蘇浙難克。卽皖南江西且有疆土日蹙之虞。過求速效。以至僨事。轉非所以仰慰。

慈廑。

穆宗允之。奉賢賊犯吳淞口。趨上海。法國輪船發砲擊之。賊退踞天馬山。陳坊橋。李恆嵩攻破其壘。賊走青浦。而浦東大股踞高橋。扼我要害。華爾約英吉利法郎西兵列陣海濱。而自率美利堅人白齊文戰高橋。盡平賊壘。上海解嚴。華爾白齊文願改服色隸中國。

詔獎四品頂戴花翎。二月華爾攻蕭塘克之。三月庚寅李鴻章率陸師五千五百人發安慶。壬辰至上海營城南。詔鴻章署江蘇巡撫。從曾國藩請也。鴻章初隨侍郎呂賢基在皖團練。頗被謗議。賢基薨。隨巡撫福濟營。鬱鬱不自得。已乃贊國藩戎幕。襄理文牘。未領兵也。會

朝廷垂詢蘇撫。國藩薦鴻章可大用。乃令揀湘軍良將程學啟郭松林等領六營。以知府李元華所領皖軍增募淮勇爲五營。劉銘傳潘鼎新張樹聲韓正國滕嗣武等分領其眾。淮軍之興自此始。其後銘傳鼎新樹聲皆擢將帥。學

啟嗣武至提鎮正國早亡皖人游膺督撫者前後相望其
他提鎮司道不可勝數與湘中將帥分道比隆矣淮軍初
起時所部半楚勇高壘深濠晨夕操練吳人以爲創見泥
中兵勇尙奢靡而楚軍衣幟樸陋外國人或譏笑之將弁
頗慚鴻章曰軍貴能戰待吾破賊懼之是時揚州急

朝旨促鴻章布置滬防卽往鎮江與都興阿會師鴻章以
兵數單不能分援各路請期歲時資訓練華爾李恆嵩會
英法二國兵復嘉定青浦留西兵與常勝軍守之英提督
何伯請鴻章會攻浦東廳縣鴻章乃以程學啟劉銘傳潘

鼎新郭松林將湘淮人攻南匯號北路軍而英法兵自松江進金山衛號南路軍辛未常勝軍會英法兵克奉賢法提督卜羅德中鎗殞

詔賞貂皮綵絨卹其家壬申克柘林偽忠王李秀成在蘇州聞嘉青皆克自將援太倉知府李慶琛方攻太倉兵敗死之賊悉銳攻青浦嘉定英法提督怵賊眾遣隊突圍護其軍出嘉定並強挾各官以走嘉定復陷英法兵還上海不復出賊益趨青浦松江攻泗濱守軍皆潰遂分趨虹橋漕河涇距上海二十里五月甲申鴻章急檄程學啟等由

浦東還扼虹橋。丁亥。學啟敗賊漕河涇。戊子。擊破泗濱。援賊進營新橋。涇。劉銘傳。潘鼎新。復南匯。川沙。浦東漸定。賊圍松江急。華爾李恆嵩分門要擊。賊頗創。而青浦被困。華爾議棄之。甲午夜。簡常勝軍之銳者。猝破天馬山。由礮路突入青浦。悉焚米糧軍船。死戰出城。併力守松江。壬寅。僞聽王陳炳文。僞納王邵雲官。率數萬眾犯新橋。圍程學啟營數十重。填濠拔鹿角。學啟以鎗礮禦之不及。則擲甌石擊賊。尸平濠。將藉以登。學啟然劈山礮開壁突擊。賊乃卻。而賊之分股已踰新橋十餘里。勢且逼上海。鴻章自將七

營往援。遇賊徐家滙。張遇春奮力擊走。追之至新橋。學啟望見旗幟大呼出壁。賊駭奔。外國軍見其戰。自以爲不如。自此上海湘淮軍始振。中外人無復敢揶揄者矣。是月。曾國荃進兵雨花台。

詔仍命李鴻章赴鎮江。助攻金陵。鴻章奏。臣接曾國藩書。頗以進攻金陵兵單爲虞。曾國荃亦言。官軍止能圍西南兩面。深溝高壘。以水師爲根本。以江面爲糧路。先自固以圖賊。非增二萬人不能合圍。臣查金陵城大而堅。和春張國樑統師八九萬。圍攻日久。功敗垂成。今蘇浙徧地賊區。

處處可進援。尤與昔年情形迥異。所恃楚軍穩慎。較勝他軍。曾國荃軍數不及二萬。不足合圍。卽未能制賊死命。此次李秀成撲犯松滬。負創而遁。聞將連合杭湖賊眾。救援金陵。臣急欲馳往鎮江。就近援助。無如原部陸軍僅數千人。分兩處則均不得力。專一處則尙可自立。軍事重大。臣何敢易言之也。滬中官民向恃洋人爲安危。乃援賊未來之先。洋人分兵四出。援賊大至之後。洋人斂兵不動。臣揆度夷情。似非暗與賊通。坐觀成敗。實係懾於賊眾。不敢向前。是知洋人不可專恃。滬防必須自強。臣忝任蘇撫。旣不

能棄滬中餉源之地。又不敢緩鎮江接應之師。曾國藩處似亦無統兵大員可派來滬。容臣將滬事辦妥。移師出江。詔緩鎮江之行。六月。潘鼎新劉銘傳復金山衛。賊遁浙江。松滬解嚴。黃翼升淮揚水師踰九洲。浮海至上海。

詔翼升署江南提督。前提督曾秉忠所部艇船廣勇分防浦東西。多剽斂不法。秉忠以是奪官。翼升師船穿賊壘。多被礮傷。鴻章乃令曾秉忠嚴束所部。扼要隘。俟翼升師船修補。乃換防。且奏論紅單船不可用。請裁撤。七月乙未。程學啟克青浦。留軍與淮揚水師守之。常勝軍浮海克餘姚。

辛丑僞募王譚紹洸犯青浦西門黃翼升水師敗之丙午
犯北簞山滕嗣武韓正國乘賊填橋出擊水師乘之賊乃
長驅攻北新涇守將況文榜相持七晝夜賊分股掠法華
鎮西距上海十餘里八月辛亥朔水師將王東華乘潮毀
賊浮橋賊屯南岸彌望二十里旦夕犯上海人心恟懼鴻
章部將惟張遇春軍三千在滬然皆分防百里內乃飛檄
劉銘傳由金山衛華爾由松江倍道來援約程學啟青浦
諸軍以其半留守而率半隊急趨泗涇七寶出賊後咸聽
學啟指撝鴻章自將上海兵約期與學啟會擊北新涇壬

子漏將盡。學啟間道裹糧至七寶。譚紹洸率三萬眾圍學。啟營往來馳突。銳甚。學啟閉壁伺其懈。發礮擊之。傷賊甚夥。韓正國裹創搏賊。滕嗣武郭松林周盛波張樹珊張桂芳等咸奮力苦戰。學啟往來督之。賊大潰。譚紹洸走野雞墩。癸丑。李鴻章與學啟會師北新涇。滕嗣武郭松林已入。況文榜營。軍中見援軍幟。咸譁呼出壁。攻破賊壘十餘。賊走吳淞江北。阻大河列陣。黃翼升水師自青浦乘潮入。與敗賊相持。夜大風雨。發礮如雷。斃賊數百。毀其北岸營七。賊始卻。甲寅。劉銘傳敗賊野雞墩徐家滙。乙卯。追之至南。

翔賊遁入嘉定。滬防復靖。丙子淮揚水師華元龍敗賊澱
山湖。丁丑華爾克浙江慈谿。創甚死之。以白齊文領常勝
軍。華爾美國鈕要人。咸豐十年應吳煦募。積功至副將。嘗
以五百人破賊十餘萬於松江之迎喜濱。天馬山最爲奇
捷。及死從其志。以中國章服斂葬松江。閏八月李秀成自
蘇州援金陵。楚軍患疫。上海軍亦多病。李鴻章增募淮勇
五千。曾國藩檄李朝斌倡興太湖水師。赴松滬會剿。九月
英提督何伯恥前此嘉定之失。以將受代歸。詣李鴻章約
攻嘉定。鴻章遣李恆嵩白齊文率常勝軍千五百人。礮勇

千人與之偕。何伯自領英法兵二千五百人進攻。辛亥。西兵築礮台。然炸礮。日將午。南城傾。賊開西門奪路走。遂克嘉定。敗太倉援賊。以況文榜駐之。譚紹洸等復糾蘇州嘉興賊十餘萬。自崑山太倉趨松滬。丙辰。犯四江口。圍劉士奇鄭國魁營。遂犯黃渡。盡築卡於橋梁以阻師。程學啟時屯黃渡。令周盛波郭松林等分左右迎擊。截賊爲二。追之安亭。鴻章以四江口被圍久。自將至黃渡督戰。時譚紹洸部眾屯吳淞江北。陳炳文鄧光明踞南岸。辛未。鴻章令劉銘傳當中路。程學啟當右路。郭松林當左路。自辰至未。戰。

不克松林銘傳皆偪賊壘拔鉞逾濠伏而前斬黃衣酋數人賊少動乃冒煙入毀其壘二右路賊趨救學啟已受礮子傷見賊旂掣退裹創疾前與陳飛熊等以二千人然洋鎗賊由南岸潰而北我軍三路掩殺四江口圍始解賊走崑山常勝軍亦破賊白鶴江黃翼升水師要擊潰賊追之三江口循途燬其浮橋石卡殆盡滬防三次解嚴賊自是不復窺松滬

詔真除李鴻章江蘇巡撫方曾國荃之被圍金陵也鴻章疏請多隆阿南援而以陝事責勝保然其勢已不及曾國

藩檄召程學啟方戰黃渡不能應乃議令吳煦率白齊文常勝軍往十月曾國荃擊退蘇浙援賊馳書止常勝軍然已疏報不可止乃議移攻九洑洲吳煦至鎮江待白齊文不至還上海白齊文方閉松江城索餉毆道員楊坊於上海攫取餉銀四萬兩上海軍事諸國皆受英國指李鴻章乃延英提督士廸佛立領事麥華陀告之故解白齊文兵柄捕治之奏劾吳煦楊坊褫其職責償所費十餘萬兩以常勝軍故創於二人也白齊文既獲弗加誅勒令歸國以李恆嵩奧倫領其眾未幾鴻章與英提督議約以戈登易

奧倫仍令恆嵩同領之。裁減冗費，留三千人，仍號常勝軍。乙巳，黃翼升督水師，規蘇州，擊賊於蘆墟。尤家莊、汾湖三官塘盡破其卡。丙午，回軍洪家灘。至嘉善之窑街，丁未，抵夏湖西塘，援賊大至。副將蔡東祥都司曹相主歿於陳。十一月，常熟賊錢桂仁、駱國忠、太倉賊錢壽仁款於游擊周興隆。李鶴章約期內應，適李秀成新自金陵還。蘇州錢桂仁內懼，託往謁覘之。駱國忠恐，誘桂仁黨盡誅之。舉城降。興隆收復常熟。國忠復令其下至福山招降。福山賊已固守。十二月戊寅朔，駱國忠攻福山。澣浦白茆徐六涇諸海

口。同。日。下。之。李鶴章程學啟攻太倉。阻風雪弗能進。錢壽仁知事洩。率二千人出太倉。詣上海歸誠。復姓名曰周壽昌。而蘇州內應事復洩。李秀成召無錫江陰六七萬眾爭常熟。官軍分守嘉定青浦。不能應。鴻章乃檄福山鎮鞠耀乾泊福山。徐六涇爲常熟聲援。而囑周興隆駱國忠堅守。鞠耀乾師船初與賊持。已而爲颶風所擊。移北岸。福山復陷。鴻章復約黃翼升統水師三營出海赴之。而令陸師分攻崑太。戊戌。程學啟進崑山之蟠龍鎮。擊賊敗之。壬寅。奧倫李恆嵩率常勝軍攻太倉。李鶴章郭松林會之。甲辰。然

炸礮破賊壘。渡河據之。乙巳。復以炸礮擊太倉城。城裂數丈。常勝軍先登。賊洋鎗落如雨。浮橋猝斷。軍亂爲所乘。常勝軍死數百人。郭松林禦之以退師。軍氣大阻。次日奧倫達挾其軍還松江。而淮揚水師赴福山者。亦以颶風損船。黃翼升屢覆於水。乃移旋避風。常熟援守益孤矣。

二年正月。李鴻章以常熟急。檄劉銘傳等領三千人乘輪船赴福山。與黃翼升會師。復令常勝軍往助。二月甲午。戈登然炸礮。呂宋兵乘小舟薄賊壘。駕浮橋。伏死士於城牆下。日中。港東西賊壘皆破。遂奪福山石城。周興隆登城。見

賊入西山而福山火起。知援軍已破賊，乃開四門出戰。福山水陸軍亦至。賊大奔。常熟圍九十餘日。至是始解嚴。李秀成由江浦新河口再犯江北。西掠至六安。皖北大擾。李鶴章程學啟方攻太倉。僞會王蔡元隆乞降。許之。三月乙卯，鶴章學啟嚴陣以待。鶴章渡河將入城。賊忽裹白巾出東南門來犯。軍急退，亡數百人。鶴章傷足，幾及於難。學啟方扼西門，猝見賊舟數十自崑山來，與賊語甚嘔疑。而防之賊千人果出戰。學啟奮擊卻之。李鴻章聞警，令劉秉璋馳救鶴章。而調常勝軍會攻太倉。戊午，學啟會水師歐。

陽利見偏西門常勝軍毀南門賊卡庚申戈登以大礮列
學啟營前毀石壘二辛酉益發炸礮攻城日將晡城裂賊
走南門不得出斬捕幾盡遂克太倉學啟偕戈登進崑山
攻兩日不下戈登領常勝軍暫歸松江學啟屯崑山東門
令劉士奇屯北門周良才扼周市四月甲申周良才敗賊
周市丁亥學啟令周良才襲賊後劉士奇分左右翼進學
啟自督親兵繼之適戈登至自松江以炸礮助攻竟日破
賊壘二十四殺賊近萬戈登銳意攻城學啟謀曰崑山三
面阻水陸路達蘇州必道正義我奪而據之絕其援而斷

其歸路破之必矣。己丑，學啟約郭松林等水陸攻正義，戈登繼至，殺賊三千，以陳有昇等守之。譚紹洸率四萬眾來爭，學啟令郭松林等會水師扼隘口。周良才等屯北門橋，何安泰等扼東門，而自將當正義大道。日已暮，紹洸悉悍黨出小西門，中伏，還走入城。學啟合諸軍攻益力。庚寅，克崑山。譚紹洸由陽澄湖遁。時劉銘傳屯鹿苑，規取楊舍。楊舍隸江陰，居蘇常之交，故有城，賊踞之以蔽江陰。無錫者也。甲午，黃翼升水師由夏橋港破江陰賊。乙未，劉銘傳偪陽舍而軍。劉盛藻營東北隅，戊戌，然炸礮，壞城數丈。劉盛

藻揮軍設雲梯。賊以洋鎗抵城缺。軍士頗傷亡。銘傳趣隊益急。盛藻負板以登。楊舍復城。賊無逸者。自崑山之克。程學啟益規畫取蘇州。五月。由唯亭用直移駐外跨塘。距蘇州日益近。李鴻章奏言。今常熟解圍。太崑迭克。蘇嘉之賊。猶圖死抗。蓋嶮足自固。而利不肯棄。李秀成爲諸賊之冠。據有蘇杭嘉湖四郡之地。最多狡謀。咸豐十年。圖解金陵。長圍則攻浙江。以取遠勢。十一年。圖救安慶。則攻江西。湖北。以取遠勢。去年迄今。復救金陵。則分竄皖南北。又欲竄揚州。裏下河。以取遠勢。今我軍進逼蘇州。仍徘徊金陵上。

下不卽回顧。我果攻急。或挈眾來援。或別圖竄踞。均在意中。臣軍水陸已踰四萬。曾國藩又令總兵李朝斌率太湖水師十營。尅日下駛。今擬酌分三路。以剿爲堵。由崑山進蘇州爲一路。程學啟陸軍當之。由常熟進江陰無錫爲一路。李鶴章劉銘傳陸軍當之。黃翼升督淮揚水師相輔並進。戈登常勝軍移駐崑山。專備各路援應。泖澱湖達吳江。平望太湖爲一路。則李朝斌水師當之。又恐杭嘉湖賊繞竄浦東。窺撲松滬。復令常鎮道潘鼎新八營扼金山衛。編修劉秉璋七營扼洙涇。副將楊鼎勳五營扼張堰。聯爲一

氣以防內竄。

穆宗嘉之。時李秀成在江北。聞湘淮軍且圍蘇州。乃渡江。至無錫。率五僞王眾號數十萬。連營六十里。聲言援江陰。攻常熟。李鶴章令劉銘傳攻其左。郭松林等攻其右。滕嗣武等當中路。黃翼升水師助之。鶴章率馬隊登顧山吹角。趣諸軍戰兩日。銘傳軍破賊壘二十七。松林等軍破賊壘二十五。嗣武等軍破賊壘二十三。顧山以西賊皆盡。六月。僞護王陳坤書大舉犯楊舍。劉銘傳屢擊破之。程學啟進攻夾浦。蘇州賊自寶帶橋來援。敗之。遂克寶帶橋。復敗賊。

於九里湖。克同里鎮。戈登李恆嵩乘間趨吳江。賊酋舉城降。學啟遂復吳江。戈登以常勝軍歸崑山。適白齊文投賊。率外國流氓二百入蘇州。流氓猶言無賴也。李鴻章令戈登嚴備之。而移檄各國領事。禁洋人濟賊。嘉興賊犯吳江。程學啟擊走之。賊入平望。學啟留將分守吳江夾浦。自歸唯亭。賊攜外國流氓犯夾浦。發小炸礮擾我軍。學啟軍擊卻之。七月。李朝斌率太湖水師至上海。李鴻章與朝斌出巡。溯吳淞而西。以太湖通蘇浙。賊船如織。令學啟與朝斌會師夾浦。朝斌督師船百艘。攻沿湖賊卡下之。賊距東洞。

庭山九里築兩壘通蘇嘉往來學啟分水陸攻三日兩壘
皆克學啟乃還軍偪葑門婁門而令太湖水師泊南舍鎮
以圖蘇州鴻章益促劉銘傳等攻江陰劉秉璋等徇嘉善
以分賊勢銘傳圍江陰急陳坤書自常州來援銘傳令周
盛傳禦之而賊來益盛李鶴章率洋鎗隊至自常熟與賊
久持頗傷亡增召張樹珊等出常熟福山郭松林等出祝
塘周莊黃翼升水師駐江干銘傳屢以炸礮燬賊壘八月
乙亥朔城賊內應遂克江陰劉秉璋潘鼎新亦克嘉善之
楓涇西塘李鴻章親視婁門程學啟營遣張樹聲等援蕩

口破賊謝家橋追之至齊門復敗賊黃埭學啟進屯永安橋賊開婁門葑門齊門分道來犯外國流氓昇炸礮助之學啟三路禦賊外國炸礮多不裂賊驚爲神收入蘇州學啟遂逼城而軍於是婁門賊道始絕譚紹洸黃子澹率七僞王攻學啟不勝李秀成新自金陵引軍至學啟方攻寶帶橋戈登與法將龐發乘輪船會師克其石壘追之至盤門秀成親率悍賊來戰學啟奮臂大呼軍士忍飢還擊日已暮賊乃卻范遇春等陣歿翼生陽鄭國榜皆受創以戈登龐發屯寶帶橋學啟與李朝斌水陸扼要隘於是葑門

道亦絕。初，白齊文匿上海，掠我所租輪船二獻賊。李秀成乘之由齊門至西白蕩漕莊口，譚紹洸出葑門來襲。水師要擊，輪船不得出湖。紹洸退，秀成始改道由虎邱望亭犯大橋角。白齊文輪船助之，發西洋所號三十二磅炸礮者墮我軍所觸，皆糜死者枕籍。周壽昌率死士持連珠噴筒，膝行伏河干，擊之，燒其輪船一，延及長龍礮艇。洋人及船賊殲焉。賊舟大亂，李鶴章援軍適至，賊奔后宅，復爲黃翼升水師所敗。李秀成痛哭去。九月，秀成復糾賊八九萬據后宅，令諸僞王由望亭后宅屯營互進。李鶴章攻之不克。

賊益召諸巨酋集西路。冀保無錫以援蘇州。程學啟戈登方攻蘇州五龍橋。五龍橋在寶帶橋西五里。賊由澹臺湖鮎魚口達太湖以通浙江者也。學啟自率水陸四千人由寶帶橋戈登輪船由鮎魚口攻其左右。李朝斌水師進澹臺湖破賊壘六。譚紹洸出盤門來援。張遇春敗之。紹洸約嘉湖賊至同里犯平望。爲蘇賊聲援。學啟屬戈登守五龍橋。自領水陸三路趨平望。會軍八坼大破之。僞會王榮王僅以身免。令陳有昇等駐五龍橋。於是盤門出太湖之道亦絕。時李秀成踞后宅西倉麻塘橋。李世賢則北踞惠山。

高橋南及坊前梅村列隊數十里犯緱山李鶴章令周盛波劉銘傳攻坊前張樹聲郭松林攻梅村麻塘自領洋鎗隊援應三路皆大捷而秀成麻塘石營終不克松林傷乃返十月李鶴章益促諸將番進偪東亭攻李世賢劉銘傳毀其營牆數丈劉盛藻率親兵越入賊火鎗如雨仍不克而蘇州軍已奪許墅關賊聞皆驚許墅在蘇州西僞來王陸順得守之程學啟戈登越蘇州進攻黃翼升水師會之戈登已破王瓜涇賊壘六學啟破觀音廟賊壘四遂會攻許墅克之進毀十里亭賊壘虎邱楓橋賊皆遁躡之至閶

門戶骸填道自太湖水師到防黃翼升水師當赴淮揚曾國藩以苗沛霖反淮上檄翼升援臨淮而提督楊岳斌侍郎彭玉磨均以水師替防益促翼升西上李鴻章奏翼升攻蘇州無錫方亟李朝斌僅能顧蘇州以南俟蘇錫克乃遣翼升

旨如議鴻章以程學啟攻蘇州久不下親赴婁門督師賊自盤門迤北東至婁門連營數十皆附牆穴地覆板累土其上以避炸礮而婁門外石壘長城尤堅屹不可拔鴻章度賊眾雖盛外援漸絕益促學啟戈登攻城己丑夜軍士

闔設浮橋銜枚疾進戰已達其壘矣賊伏斷橋下以洋鎗狙擊常勝軍多傷亡不能進李秀成方閒道入城助譚紹洸爲守壬辰我軍盡出炸礮二十餘轟其壘學啟緣南岸戈登緣北岸鴻章親督之日過午牆頗傾秀成紹洸率萬人出婁門拒戰學啟麾軍大進常勝軍肉薄先登長城石壘皆破秀成紹洸還走入城當是時水師將陳東友自黃天蕩登陸擊賊婁葑兩門克賊壘二十餘黃翼升況文榜擊賊齊門破之李朝斌張遇春亦破盤門六壘我軍三面薄城賊益洶懼譚紹洸夙凶忍猶率悍黨死守而郅雲官

等有貳心。密款於副將鄭國魁。學啟戈登單舸。見雲官等。於城北洋澄湖。備得其要領。命斬秀成。紹洸以獻。而給雲官等二品武職。學啟與爲誓。戈登證之。雲官益不疑。而不忍殺秀成。許圖紹洸。甲午。秀成微覺之。顧事已無可爲。涕泣握紹洸手爲別。乘夜出胥門。由雲巖木瀆以逸。官軍攻益急。丁酉。紹洸以事召雲官。攜僞天將汪有爲往。卽坐刺殺紹洸。並殺其黨千餘人。開齊門迎降。學啟令鄭國魁領千人入城。戊戌。獻紹洸首請驗。學啟入城撫視。降酋列名者八人。精壯猶踰十萬。羣酋方歆血誓生死。乞學啟白鵠。

章要總兵副將官署其眾爲二十營。仍屯閭胥盤齊四門。雲官且未薙髮。學啟密白鴻章。恐不可制。必誅之以定眾。鴻章猶豫不忍發。而徇學啟請。弗能阻。己亥。僞納王郅雲官比王伍貴文康王汪安均甯王周文佳僞天將范起發張大洲汪瓌武汪有爲出城謁鴻章。鴻章先備二品冠服待之。甫參謁。鴻章遽入帳。學啟先已置人帳後。伏起悉斬之。學啟入城諭眾。誅拒命者二千餘人。餘皆聽命。遂克蘇州。庚子。鴻章整部入城。而副將鄭國魁故與郅雲官誓不相殺。憾學啟負約。涕泣不食。卧三日。鴻章亦頗咎學啟輕。

發曰君亦降人也何爲已甚學啟大怒還營將引軍去其營弁奔告鴻章鴻章復過學啟陽論他事笑語甚歡事乃解鄭國魁終以誑殺雲官怨不已洋將戈登夙暱學啟至是以殺降詈之揚言挾其軍且爲變覓雲官首攜之哭並索得其養子送崑山鴻章乃令國魁爲雲官設佛事七日親詣祭弔國魁叩棺大哭呼曰殺汝者自有人吾不汝詐也鴻章泣數行下眾乃輯服李秀成之棄蘇州西遁也乘小輪船毀無錫西門橋以出繞至萬壽橋令賊乘霧圍我營其輪船發炸礮衝高橋水師劉銘傳率百人伏河埂以

洋鎗斃外國舵師。賊乃匿駛輪而去。圍營之賊亦走。劉銘傳乘勝進無錫南門。周盛波進北門。張樹聲進東門。黃子澂聞蘇州已殺降。率七萬人死守。十一月甲辰朔。郭松林破惠山亭子橋石卡。乙巳。張樹聲郭松林周盛波破東南北土壘皆盡。望城賊漸移。疾逾河昇梯以登。周壽昌擒僞潮王黃子澂。郭松林擒其子黃德懋。並獲僞酋數百。駢誅之。遂克無錫。李鴻章奏言。僞忠王李秀成。自咸豐十年春。開破金陵長圍。壘陷蘇常杭嘉湖。上竄江西湖北。擄脅潰兵遊匪以百萬計。盡得東南財賦之區。取精用宏。日以強。

大自去歲屢戰屢敗及投降各城精銳散亡不下二十萬今年春夏閒竄皖北經上游官軍截殺解散又十數萬其自九洲過江僅存四五萬人維時僞天王驚惶失措猶賴李秀成回金陵主持守局而秀成以蘇州爲分地事急故須回援其部眾布滿蘇浙以踞守蘇州之譚紹洸郅雲官踞守杭州之陳炳文鄧光明踞守無錫之黃子澐爲最悍且眾今秀成巢穴已失黨羽已孤踉蹌西走隨行僅兩萬餘人將赴金陵解圍曾國荃鮑超等兵勢正盛攻勦正緊料其無法解救則挾僞天王洪秀全及其母妻眷屬由

浙皖交界上竄江西福建以尋回粵之路臣駐蘇州徧察賊中城守規畫布置極有條理深以未得擒殺此酋爲憾現曾國藩派兵回防江西左宗棠派兵分截皖南固已豫有戒備但使不再踞城池變爲流賊剿滅較易臣今擬令程學啟李朝斌劉秉璋潘鼎新由平望乍浦兜剿浙西之賊冀與左宗棠蔣益澧之軍前後夾擊李鶴章劉銘傳進常州宜興兜剿蘇境之賊冀與曾國荃鮑超之師前後夾擊欲分各路賊勢藉固蘇滬藩籬惟各軍自春徂冬積勞致病須略加休息以待進取

穆宗嘉允之。辛亥，劉秉璋、潘鼎新攻浙之平湖，賊酋陳殿選降，遂復平湖。於是乍浦、海鹽、澉浦皆反正。丁巳，劉銘傳進攻常州，破東北賊壘數十，收降眾萬六千人。戊午，張樹聲、周盛波襲破東門石壘二，與銘傳軍相應，乃會攻小北門。銘傳額中鎗傷，盛波追賊過西門，破南門石壘。己未，張樹聲傍城東北築四壘，以偪賊。庚申，攻小北門土城，克之。是時李秀成攜妻孥乘輪船至溧陽，復由溧陽入奔牛運河，日夜發炸礮擊我營。十二月乙亥，劉銘傳抽隊二千援奔牛，阻賊不得達，乃約郭松林滾營前進。李鶴章令董鳳

高等繼之李秀成李世賢陳坤書益召金壇溧陽丹陽常州賊數萬聚奔牛鶴章增調三千人與銘傳會軍丁亥曹仁美以火蛋焚其輪船銘傳松林乘勢大破之羣賊還走丹陽

三年正月丙寅郭松林戈登克宜興松林進攻溧陽擊破李世賢於張渚世賢退溧陽守賊吳人杰不納世賢走湖州二月壬申朔吳人杰迎降癸酉郭松林復溧陽甲戌進軍金壇乙亥敗僞劉王襄王於楊巷追至金壇南門是時常州賊陳坤書方合丹徒句容賊十餘萬繞常州城北築

壘數十日犯我軍。劉傳銘屢擊退之。值陰雨連旬。賊奄至江陰之南關。辛卯犯常熟。壬辰犯福山。所過焚掠。於是江陰無錫常熟皆警。蘇州以西大震。李鴻章飛檄郭松林棄金壇勿攻。倍道歸援。令李鶴章守無錫。李昭慶鄭國魁由嘉興賈宏材由無錫符信由蘇州助守常熟。賊分趨無錫。李鶴章拒卻之。而江陰賊亦爲守將駱國忠所敗。賊遂併趨常熟。黃翼升水師方還江北。乃由白茅口進常熟。與王東華水師會。郭松林破賊於王莊。翼升東華截之。賊首尾不相救。自相蹂。掩殺無算。常熟解圍。賊走福山。陷之。守將

鞠耀乾鐫級以郭松林爲福山鎮總兵己丑程學啟克嘉興學啟之攻嘉興也僞榮王廖發受乞降學啟知其詐攻益力陣亡勇將何安泰學啟坐礮台三晝夜自發田雞礮斃賊無數僞堵王黃文金自湖州來援遣張家瑜等擊走之學啟益發炸礮壞城促將士先登死者枕藉學啟憤自逾浮橋乘城左腦中鎗子昇歸營潘鼎新劉秉璋李朝斌相率入城學啟養傷蘇州創已合一日獨坐深念有所忿創口復裂竟死學啟桐城人先陷賊中安慶之圍款於曾貞幹約內應未及期夜率千餘人叩壁門呼曰今事發與

賊戰追者卽至公相信者開壁門納我不信急發礮擊我無兩敗也軍中大驚疑貞幹開門納其眾俄而追者果至學啟由是願效死貞幹已乃隨曾國荃國荃尤奇其才破安慶多資其力李鴻章之赴滬也請於曾國藩挈學啟以東所部號開字營勇略冠軍料敵輒奇中其突圍陷陣見者以爲神兵洋將戈登素敬服學啟比誅降酋久不見聞其死乃泣下以所建二旗歸訖海國鴻章論其功爲吳中第一

詔蘇州嘉興皆建祠庚寅左宗棠克杭州三月李鴻章督

軍圍常州。時城西賊營猶二十里。環列運河左右。乃令劉銘傳破其西北六壘。郭松林楊鼎勛攻陳渡橋八壘破之。張樹聲周盛波鄭國魁攻河干二十餘壘盡破之。於是賊西道皆絕。壬戌。炸礮壞城數十丈。陳坤書以洋鎗隊抵城缺。官軍與賊多傷死。終不克。是時馮子材富明阿由鎮江進丹陽。賊壘多降。鮑超由句容攻克金壇。常州守賊益孤。四月。李鴻章令軍士傍河築長牆。設浮橋。期必克。顧久雨不霽。甲戌。禱於關帝之神。次日雨稍止。乃令劉銘傳攻北門。戈登礮隊攻南門。郭松林楊鼎勛應之。劉士奇王永勝

攻東南隅。張樹聲應之。丙子。天大霽。反風水陸礮聲發。如雷。煙焰撲城頭。舊壞城復傾數十丈。賊以人塞缺口。值炸礮。則甃石旗械紛激起天際。然旋死旋集。終弗退。鴻章益揮軍登城。郭松林王永勝劉士奇接刃戰城頭。久之。賊始潰。僞護王陳坤書僞列王費天將皆就擒。銘傳松林令於城棄械者免。跪而降者數萬人。官軍亦亡千餘。遂克常州。戊寅。馮子材復丹陽。於是蘇常賊悉由徽州入江西。曾國藩檄鮑超西援。而屬鴻章分兵代防。乃以劉銘傳屯句容。鄭國魁屯東壩。周盛波屯溧陽境。馮子材鎮江軍凱撤。以

張樹聲駐守鎮江。撤常勝軍三千人。戈登歸國。留礮隊六百。人以副將羅光榮領之。移駐許墅。鎗隊三百人。隨總兵李恒嵩駐崑山。六月。曾國荃克金陵。曾國藩大散湘軍。其後挈淮軍北征。遂用以平捻匪。

王定安曰。李公鴻章。初以優貢客京師。卽師事曾公。國藩其後入翰林。出贊呂賢基福濟軍事。崎嶇顛沛。讒謗頗起。福公嘗具疏薦道員。鄭魁士阻之。旣

簡延建邵遺缺。擁空名。無官守。遇亦艱矣。曾公督兩江。議興淮揚水師。請補江北司道。未行。復薦兩淮運使疏至。

文宗北巡不之省。李公亦自以爲數奇。不復言祿矣。未幾穆宗卽位。詢蘇帥。曾公復薦李公。遂以道員超擢巡撫。數年之間。南定吳會。北平捻匪。剖符封爵。位兼將相。勛業爛然矣。嗟夫。士之未遇也。固有飯牛版築三北而不羞者矣。及其遭遇聖明。乘時利見。罄其才智。則可以迴乾坤挽山河。故曰張之則爲龍。弛之則爲蛇。自古聖賢豪傑。見知於天子。建樹於時者。始未嘗不淹塞。後乃烜赫也。嗚呼。如李公者。可謂無負曾公知人之明者歟。

湘軍記卷十

武昌范德培校字